



Peter Olsen
Inatsisartuni ilaasortaq
/Maani

**Mittarfinnik alliliinissaq pillugu § 37 naapertorlugu apeqquteqaammut nr. 119-
imut akissut**

Brevdato: 30-05-2016
Sags nr.: 2016 - 7949
Dok. nr. 10553182

Aallarniutigalugu mittarfinnik alliliinissaq pillugu apeqqutinnut, Inatsisartut suleriaasianni § 37 naapertorlugu nassiussimasannut qujavunga. Matumani akissuteqarnissannut atugassamik Aningaasaqarnermut Naalakkersuisoqarfik tapiliussassaanik pissarsiniarfigaara, apeqqutit 1-imiit 7-imut akissuteqarfignerini immikkut atugassamik.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nаноq.gl
www.naalakkersuisut.gl

1.

UKA 2015 oqaluuserisami imm. 167-mi inatsisartut ataatsimoortut akuersissutigalugu aalajangiuppaat naalakkersuisut peqquneqassasut mittarfinnik sanaartornissaq pillugu nalunaarusiussasut, nalunaarusiornerlu pereerpat sanaartornissamik pilersaarusiornissaq aatsaat aallartissinnaaqullugu. Tamanna pillugu naalakkersuisunut apeqqutiginiarpara suliakkiunneqarsimasoq malillugu sulisoqarnersoq?

AKISSUT:

Inatsisartuni ilaasortaq tunngaviliinermini sanaartornermut ataatsimiititaliap UKA2015/167-imi aalajangiiffigisassatut siunnersuummut saqqummiunneqartumut innersuussivoq.

Torersaarnissaq eqqarsaatigalugu erseqqissaatigineqassaaq, Inatsisartut aalajangiiffigisassatut siunnersuummik taassuminnga suliaqarnermini **allannguutissatut siunnersuut** una akuerimmassuk, taamaattumillu aalajangiiffigisassatut siunnersuummut taarsiullugu atuutsinneqalerat:

” Nunatsinni assartuussinermi ataatsimut aningaasartuutit annikillisinnaasaat aamma timmisartuussisarnerup akulikillinissaa siunertaralugit, nunap immikkoortuini silaannakkut angallannermut attaveqaatit ataatsimoortut silaannakkut angallassinermut pilersaarummut ilanngunneqarnissaannik qinigaaffimmi matumani Naalakkersuisut saqqummiussinissamut peqquneqarnissaannut Inatsisartut aalajangiiffigisassaattut siunnersuut. Taamaalilluni suliaasaqarfimmi immikkoortumut pilersaarummi mittarfiit aamma qulimiguullit mittarfiisa akunnittarfiisalu pioreersut piginnaasaasa millineqarnissaat allineqarnissaallu nunap immikkoortuini tulleriarinerneq ilanngunneqassapput.”

Inatsisartuni aalajangiineq Naalakkersuisut qaangiinnarsimaneraat, Inatsisartuni ilaasortap tunngavilersuummi apeqqutigaa, taamaattumillu taamatut pisoqarsimangitsoq tassunga akissutitut oqaatigineqassaaq. Piffissami qinigaaffiusumi

matumani silaannakkut angallannermut pilersaarusiornissamik Inatsisartut suliaakkiipput, Naalakkersuisullu taanna naammassinissaanik anguniagaqarlutik sulipput.

Tamatuma saniatigut eqqaasitsissutigineqassaaq, UKA2015/167 ataatsimut isigalugu Ilulissani, Nuummi Qaqortumilu nutaanik anginerusunik mittarfiliornissamut tunngasuunngimmat, kisiannili mittarfiit pioreersut minnerusut atuuffiinik, timmisartunut 19-inik ilaasoqarsinnaasunut atorneqartussanngorlugit appaanissamut tunngasuulluni. Kiisalu aamma siunnersuut heliportit helipads-illu mittarfinnut mikisunut, timmisartunit suluusalinnit 19-inik ilaasoqarsinnaasunit miffigineqarsinnaasunngorlugit atuuffiinik qaffatsisinissamut tunngasuuvoq. Taakkunani marluusuni timmisartuussinermi ingerlatsinermut aningaasartuutit appartinneqarnissaat siunertarinqarpoq.

Siunertat taakku silaannakkut angallassinermut pilersaarutip suliarineqarneranut ilaatinneqarput.

2.

Nunatta karsia katillugu qanoq amerlatigisunik akiitsoqarpa? Akiitsut taakku sumut tunngasuuppat?

AKISSUT:

Apeqqut 3-mut akissut takuuk.

3.

Nunatta karsia amerlanerpaamik aningaasanik qanoq atorniarsinnaatitaava? Taakkunannga aningaasat qassit atorniarneqareerpat?

AKISSUT:

Maannarpiaq taarsigassarsinissamut piumasaqaatini, Naalakkersuisut Nordisk Investeringsbank-imut (NIB) isumaqatigiissutigisimasaani allassimavoq, taarsigassarsiat taarsersorneqarnerini Namminersorlutik Oqartussat tunngavissanik marluusunik ukuninnga sukkulluunniit unioqutitsissanngitsut:

- 1) Nunap Karsiata akiitsui ilanngaasereerluni isumannaallisakkat, tassalu Nunap Karsiata akiitsui ilanngaaseereerluni erniaqartinneqartut aammalu ingerlatseqatigiiffiit Namminersorlutik Oqartussanit pigineqartut akiitsui ilanngaaseereerluni erniaqartinneqartut, Nunap Karsiata isertitaanit tamarmiusunit 75 %-it sinnerlugit amerlassuseqassanngillat.
- 2) Nunap Karsiata akiitsui ilanngaaseereerluni erniaqartinneqartut, tassalu akiitsut ilanngaasereerluni erniaqartinneqartut Nunap Karsiani aningaasanik atoriaannarnik ilanngaaserneqartut Nunap Karsiata isertitaanit tamarmiusunit 20 %-it sinnerlugit amerlassuseqassanngillat

Tunngavissaq nr. 1-ip naammassineqarnera

2015-ip naanerani Nunap Karsiata akiitsui ilanngaasereerluni isumannaallisakkat 1.771 mio. koruuninik amerlassuseqarput. Taakkunannga -719 mio. koruunit tassaapput Nunap Karsiata akiitsui ilanngaaseereerluni erniaqartinneqartut, sinnerilu 2.490 mio. koruunit ingerlatseqatigiiffiit annerit 11-t akiitsoraat. Akiitsut ilanngaaseereerluni isumannaallisakkat Nunap Karsiata isertitaasa tamarmiusut 26 %-iinik, tassalu 6.821 mio. koruuninik amerlassuseqarput.

Tunngavissaq nr. 2-ip naammassineqarnera

2015-ip naanerani Nunap Karsiata akiitsui ilanngaaseereerluni erniaqartinneqartut -719 mio. koruuninik amerlassuseqarput. Taakkunannga 1.293 mio. koruunit tassaapput aningaasat atoriaannaat, aammalu 574 mio. koruunit akiitsuullutik erniaqartinneqartut. Akiitsut ilanngaaseereerluni erniaqartinneqartut Nunap Karsiata isertitaasa tamarmiusut -10,5 %-iinik amerlassuseqarput.

Taarsigassarsiarineqarsinnaasut sinneri, Namminersorlutik Oqartussanit atorpeqarsinnaasut, Ilulissani, Nuummi, Qaqortumi, Tasiilami Ittoqqortoormiini mittarfinnik alliliinissamik, kiisalu nunap immikkoortuini mittarfinnik minnerusunik aalajangersimasunik amerlassusilinnik eqqarsaatigineqartunik tamanik aningaasalersuinissamut naammangillat. Mittarfiit aallarfiisat miffissallu nutaat saniatigut immap naqqatigut kabelimut, kiisalu uuliamik tikititsinissamik pisariaqartitsinermik annikillititsiniarluni innaallagissiorfinnik ergullu nukinganik innaallagissiorfinnik alliliinissamut aningaasaliisoqarnissaa pisariaqartinneqarpoq. Tamatuma saniatigut Namminersorlutik Oqartussat aamma Nunap Karsiata imaasa ilaanik immikkoortitsinissaa, kiisalu pisussanut siumoortumik ilisimaneqariingitsunut pilertortumik taarsigassarsinissamut periarfissaqarnissaa pisariaqartinneqarpoq.

Nunap Karsiata maanna akiitsui, siunissamut ungasissumut taarsersorneqartussat 574 mio. koruuniusut ergup nukinganik innaallagissiorfinnut aningaasaliissutinit 600 mio. koruuniusunit pisuupput. Taakku NIB-mut marlunnik taarsigassarsinikkut aningaasalersorneqarput

4.

Ilulissat aamma Nuup mittarfeqarfissaa allilerneqarnissaat, Qaqortumi Tasiilamilu mittarfiliassat ataatsimut taakku tamarmik qanoq naleqassappat?

AKISSUT:

Ingerlatseqatigiiffiit sanaartortussat siunnersuutigineqartut mittarfiliortiternernut ataasiakkaanut, kisiannili Tasiilaaq aamma Ittoqqortoormiit pinnagit, suliasanut siunnersuusiornissamik suliakkerneqassapput. Mittarfinni suliasanut najoqqutassiamik toqqaasoqareerpat, sanaartornermut akiusussat Naalackersuisunit ilisimaneqalissapput.

Kiisalu apeqqut 6-imut akissut innersuussutigineqarpoq.

5.

Mittarfiit sanaartorneqarnerat kikkut akilissavaat?

AKISSUT:

Naalackersuisut isummernissamut tunngavissiaanni, "Mittarfiliortiternerni suliat ingerlaqqinnissaat", 1. april 2016-imeersumi, ingerlatseqatigiiffiup sanaartortussap, 100 %-imik pigineqartup, Ilulissani, Nuummi Qaqortumilu mittarfiit aallarfiisat miffissallu nutaat aningaasalersorneqarneri sananeqarnerilu isumagissagai kissaatigineqarpoq. Isummernissamut tunngavissiaq maannarpiaq Aningaasaqarnermut Akileraartarnermullu Ataatsimiititaliami suliarineqarpoq. Isummernissamut tunngavissiaq akuerineqassappat, ingerlatseqatigiiffik siulersuisunit ilisimasalinnit aqunneqassaaq, aammalu 200 mio. koruunit aallarniutitut aningaasaliissutigineqassapput, tassanilu Namminersorlutik Oqartussat 100 mio. koruuninik akisussaaffeqarfiusunik taarsigassarsititsinikkut ingerlatseqatigiiffimmut atugassiinnaanerit periarfissinneqassaaq. Aningaasalersueriaatsit aaqqissuusseriaatsillu arlaat tullunnerunersoq ingerlatseqatigiiffiup nammineerluni naliliiffigissavaa. Naalackersuisut

ataatsimiititaliamut suliap taassuma ingerlatseqatigiiffittut ingerlanneqarneratigut iluaqutissat nassuiaateqarfigaat.

Ingerlatseqatigiiffiup arlaatigut taarsigassarsisinaanissaa Aningaasaqarnermut Naalackersuisoqarfiup naatsorsuutigimmagu, Naalackersuisoqarfiup 15. marts 2016-imi NIB-mut allagaqarluni oqaatigaa, maanna taarsigassarsiaasunut piumasaqaatit isumaqatiginninniutigeqqinneqarnissaat pisariaqarsinnaasoq. Ingerlatseqatigiiffiup sanaartortussap taarsigassarsinerata Nunap Karsiata akiitsuinut ilanngaasereerlugit isumannaallisakkanut sunniuteqartussaamera tamatumunnga peqqutaavoq. Aningaasaqarnermut Akileraartarnermullu Ataatsimiititaliap akuersissutissaatut naatsorsuutigineqartoq piareerpat, NIB-mut isumaqatiginninniarnert ingerlateqqinneqassapput.

6.

Nunatta karsia qanoq amerlatigisunik atorniartariaqassava sanaartugassat tamarmik sanaartorneqassappata?

AKISSUT:

Nuummi, Ilulissani Qaqortumilu suliassanut, kiisalu mittarfinnut aamma allineqartussanut siunnersuutini naammassisanik piareersimasoqanngimmat, ingerlatseqatigiiffiup sanaartortussap taarsigassarsiaasatut pisariaqartitassai qanoq amerlatiginersut Naalackersuisunit oqaatigineqarsinnaanngilaq. Sanaartugassat ilaasa pisortat namminersortullu suleqatigiinnerisigut (OPP) ingerlanneqarsinnaanerat ingerlatseqatigiiffiup sanaartortussap paasiniartussaavaa, tamannalu pillugu isumaqatigiissusiortoqarpat, tamanna aamma soorunami taarsigassarsiaasatut pisariaqartinneqartunut sunniuteqartussaavoq.

Aningaasaqarnermut Akileraartarnermullu Ataatsimiititaliaq Ineqarnermut Attaveqatigiinnermullu Naalackersuisumik aamma Aningaasaqarnermut Aatsitassaqaqarnermullu Naalackersuisumik teknikkimut tunngasunik ataatsimeeqateqarnermini, illoqarfinni tallimaasuni, tassalu Ilulissani, Nuummi, Qaqortumi, Tasiilami Ittoqqortoormiini, mittarfiliortiternissamut aningaasartuutissat naatsorsuutigineqartut, maannarpiaq naatsorsorneqarsinnaasut pillugit ilisimatinneqarpoq. Ataatsimiititaliaq tamanna pillugu allakkianik attuumassutilinnik nassinneqassaaq.

7.

Mittarfiit sanaartorneqarnerannut aningaasartuutit qaqugu imminut matunissaat naatsorsuutigineqarpa?

AKISSUT:

Tamatumunnga mittarfinni ataasiakkaani suliassanut siunnersuutit tunngavigalugit suliassanut nassuiaatit ataasiakkaat apeqqutaassapput. Aatsaat taakku ingerlatseqatigiiffimmit sanaartortussamit suliarineqareerpata, imminut akilersinnaassuseq kiisalu sanaartornermi aningaasartuutissat naatsorsorneqarsinnaalissapput.

8.

Kangerlussuup Narsarsuullu mittarfeqarfii pillugit naalackersuisut qanoq pilersaaruteqarpat?

AKISSUT:

Naalackersuisut suli Kangerlussuaq aamma Narsarsuaq silaannakkut angallassinermut tamarmiusumut ilaasussatut isigaat, naak mittarfinni taakkunani marluusuni

ingerlatsinermi tunngaviusut Nuummi, Ilulissani Qaqortumilu mittarfiit tallineqarnissaannit sunnerneqartussaagaluartut. Ingerlatsineq sukkulluunniit angalariaatsinut piviusunngortinneqartunut naapertuuttariaqarpoq, aammalu angalariaatsit allanngorpata, tamanna allanut imaluunniit nunap immikkoortuinut saniliusunut, mittarfinnut suliassaqarfinnuunniit sunniuteqartussaassaaq.

Inussiarnersumik inuulluaqquillunga

Knud Kristiansen